


月山詩集





成集書叢

編初

者編主
五雲王

行發館書印務商



月山詩集



3 0646 3324 5

恆仁纂

本館據藝海珠塵
本排印初編各叢
書僅有此本

月山詩集一

七十一首

述懷

憶昔趨家塾。行年總角初。書期通萬卷。時惜負三餘。受業悲于鵠。從師似郭舒。索居今幾載。不學待何如。

西園秋雨初霽。注。西園在家宅牆西。先叔祖花園也。

午牕睡足午雞鳴。雲散秋陽杲杲明。四壁苔滋侵徑綠。一池水長與橋平。梧桐落落陰徐減。鳥雀喧喧韻倍清。美景恰當新霽後。始知風月最多情。

上定齋叔父集太白句。注。先叔祖諱經照。行九。先祖胞弟。

我家僊翁愛清真。青蓮居士謫僊人。吟詩作賦北牕裏。平生不解謀此身。寶書玉劍挂高閣。斗酒十千恣歡譔。一醉累月輕王侯。興酣落筆搖五嶽。手持綠玉杖。身披翠雲裘。時時出向城西曲。一生好入名山遊。登高望遠形神開。碧峯巉巖綠水迴。清風朗月不用一錢買。拂花弄琴坐青苔。心愛名山遊。閒騎駿馬獵。羈金絡月照皇都。流星白羽腰間插。雙鶴迸落連飛鶻。弓彎滿月不虛發。白酒初熟山中歸。香風吹人花

月山詩集一

清 恆仁纂 字育萬。號月山。嘉輔國公後。封失爵。真具後附墓誌。並後



083
112
2:2300

亂飛。餐霞樓上動仙樂。美人更唱舞羅衣。舞羅衣。揚清歌。金樽綠酒生微波。百年三萬六千日。歲歲年年奈樂何。

哭女

此日黃泉送爾歸。錦衾相伴一身微。可憐半月人間住。只博雙親淚滿衣。

凌風閣

倚山小閣號凌風。醉月眠雲亦此中。解得鳶飛魚躍處。不將得失問雞蟲。

春雪

客陰羈絆陽春腳。不放東君出天幕。半夜衾寒加布裘。夢醒始覺冰花落。烏雀林間曙不鳴。堦堦望裏光逾嚼。平鋪屋瓦初沒溝。堅凍園花遲破萼。未嫌小徑積鹽絮。卻喜短簷垂洛澤。童子細意爲掃烹。主人矯首自歡噱。幸有好景足娛賞。莫惜清詞一揮霍。迴飈落屑似憐人。縱屬無情不索寞。

詠塵

穿簾日影見飛飛。一陣輕陰何處歸。自有清心如皓魄。誰言素質化緇衣。馬前豈受將軍拜。扇底何勞丞相揮。寄語梅花詩欲就。筆端無復惹纖微。

題書齋壁

一室擁書坐。從朝至夜分。方知少失學。敢道近能文。有志絕塵俗。無人廣見聞。禮經原示誠。吾過在離羣。
上巳出遊

春衣載酒水南遊。柳下泉邊禊事修。十里城壕歸路遠。日斜還買釣魚舟。

詠燕次韻

六朝金粉未成灰。春意闌珊歎昨非。有約定教尋對語。多情爭奈是孤飛。空梁寂寂留清夢。故壘蕭蕭帶落暉。王謝當年舊遊客。似曾相識幾時歸。

清明

纔過寒食便清明。接踵良辰那可輕。晚榻火爐無宿燄。午街冰盞試新聲。聞人折柳還簪髮。稚子牽絲欲放箏。節物引人清興發。爭呼樽酒踏青行。

春日雜興四首

春在閒門春亦遲。會心不遠少人知。笑看蝶粉黏花藥。坐覺鵝黃上柳枝。竹馬紙鸞皆入畫。池魚籬燕互催詩。應酬景物妨疎懶。澹處拈來底事宜。

自喜行藏判少年。浮榮過眼總雲煙。卻因閉戶閒終日。轉覺空齋別有天。好客過時留早酌。幽禽啼處破春眠。園蔬見說青堪摘。一飽寧須費萬錢。

午醉初醒閒立時。賞晴真與睡相宜。茶烹蟹眼散香雪。煙裊篆形飄素絲。雨憶昨宵聲到枕。月知今夜影如篩。晚來會發花間興。行樂三人酒一卮。
不用藏春向小山。提壺童子自知還。何妨對酒頤常解。且喜吟詩鬢未斑。美景良辰三月暮。籃輿竹杖一身閒。逢人莫話紅塵事。心在鳶飛魚躍間。

偶吟

聚石山當戶。埋盆水繞牆。園林佳趣足。魚鳥故情長。心不爲形役。詩因得酒狂。苦吟拈一笑。故紙畢生忙。
閒清書屋
數間茅屋傍城隅。每向人言勝野居。映几小牕因柳暗。環堦修竹入簾疎。心同止水清無底。境比華胥閒有餘。戶外塵鷲過不入。佳名畢竟屬吾廬。

古人有酒癖

古人有酒癖。贊頌不容口。甚至廢飲食。惟思杯在手。此語我不憑。此物我亦嗜。飲多不致亂。飲少亦復醉。美惡未暇辨。毀譽何由起。相視兩漠然。知是酒而已。

薄暮

琴書向夕靜。時復庭前步。歸鳥拂簷過。飛蚊當戶聚。涼風滿平臺。返照在高樹。茶竈煮新泉。晚煙起如霧。

遊爽心亭

冠者五六人。遊於十八盤。穿嶺探幽勝。因亭得大觀。紅塵暗城郭。白石攢峯巒。漠漠雲山合。鬱鬱松柏蟠。吾儕有逸興。杯酒共盤桓。坐覺夕陽低。浩歌天地寬。月林景物麗。誓將中夜看。忽憶歸路遠。回首空長歎。

秋海棠

欹風含露傍低簷。猶似懷人淚未乾。一段可憐香自祕。靚粧小立試輕寒。

對月

清宵一片如規月。流輝積素真奇絕。露下天高風未寒。塔前何事凝霜雪。對之使我胸襟開。當牕酌酒聊徘徊。小童掬水池邊戲。解道銀蟾入手來。

秋日雜興二十韻

白鳥廢其喙。黃蝶飛成族。百物感金隸。旋踵炎威伏。出門寡朋儕。門戶樂幽獨。暇日一卷書。秋風數椽屋。依依中庭柳。後時失膏沃。萋萋塔畔草。未霜還復綠。去年手植棗。枝頭紅可撲。多可餉親知。少亦賚童僕。小池鑿石成。受水可一斛。雙峯疊土爲。陂陀勢相屬。錦鱗二寸魚。青松千歲木。此雖城市居。堪作山林目。有時醉明月。金波疑可掬。有時過涼風。蕭蕭響叢竹。有時看霜葉。西鄰往來熟。秋園萬樹梨。紅粧爛山谷。清景行處多。高興日相續。三時積之厚。九秋發所蓄。情適境易忘。慮澹事易足。閒居過重陽。言采東籬菊。

秋聲

氣轉清商候。秋聲動渚涯。誰家催急杵。何處動悲笳。雁叫高樓月。蟲吟靜院花。長林最蕭瑟。風雨兩交加。
全毓峯過余不值改詩一字而去

君不見都官未識前村梅。偏知昨夜一枝開。又不見江南尚書老好事。誰其救之溧陽尉。此皆古人一字師。君今于我亦如之。文章求工友求益。切磋肯使留纖疵。我歸歎服君已去。相思願見無朝暮。高軒重過細論文。幸開茅塞終成路。

過九兄書屋

注。先九伯。諱九如。字錫麟。先七伯祖子。

喜從朱邸得閒身。比屋真成大隱鄰。鄴架藏書猶恨少。陶巾漉酒未嫌貧。應門童亦憐才士。坐榻賓還念故人。何必城居思野徙。高齋豈復染纖塵。

十一月望後夜作

是夜冬至

月當雙日滿。夜是一年長。對此閒無事。因之醉不妨。鑪煙濃過霧。竹影暗敲霜。坐久懷清賞。題詩志不忘。

歲暮用東坡韻三首

家家歲云徂。女工日相佐。恃此慰親朋。珍重若居貨。香纓麝帶長。彩索縹囊大。繡字龍蛇舞。織錦鴛鴦臥。草木及蟲魚。巧製足驚座。我欲賦其事。紙竹逢耗磨。同人富佳篇。良辰不虛過。安得起九原。更索坡翁和。

右饋
歲

古人惜寸陰。去日何遲遲。我今棄歲月。一往不可追。當此元律窮。臨歧恨無涯。新歲即悠遠。未必如舊時。嗟彼飲食人。所樂在甘肥。嬉遊墮學業。撫懷良自悲。吟詩為相送。去去與我辭。明年倘繼作。驗取興不衰。

右別
歲

歲去何能守。何異添足蛇。聊復醉夜闌。羣居話周遮。杯空意未盡。如此良夜何。兀坐有所思。兒女且勿譁。竹馬稍罷馳。畫鼓亦停撾。不睡竟何益。忽忽燭易斜。無為愛一夕。多年任蹉跎。好樂貴無荒。狂飲安足誇。
右守
歲

答九兄問小園杏花。兄近自山中歸。

手種三年杏。花開半畝園。自嫌禮李俗。卻比小桃繁。西子春酣酒。東坡日閉門。不知山寺賞。可許到黃昏。

吾宗室柳泉先生。工詩善畫。未獲侍教。先寄是詩。注。柳泉。講穆堂。

康熙諸王孫。文章一聚會。河間與東平。英聲遍四海。卻後二十年。詩筆有人再。泓渟柳下泉。直接松間派。

松間。紅陶主人詩集名。注。紅陶諱岳端。原封固山貝子。曰余生後時。門牆隔濤瀨。死者去已遠。生者猶足賴。誓將載一卷。束脩

修再拜。應念同岑草。未忍麾戶外。

盆榴作花憶荆公。語作一絕。

一點紅開萬綠枝。動人春色正如斯。驪山搖曳諸姨隊。不及西施溪上時。

枯柳歎

閒清堂畔柳枝新。昔年長條低拂塵。天桃穠李各鬪豔。此樹媿媿偏依人。豈知中路顏色改。根株半死當青春。草堂無色感杜甫。枯櫟病柏同悲辛。婆娑生意幾路盡。穿穴蟲蟻難完神。一枝旁抽獨娟好。亦有狂絮飛來頻。人生寧無金城感。過情悲喜傷吾真。且把盃酒醉木本。榮枯過眼安足論。

詠史四首

七十有餘戰。八千無一人。自知天命在。慷慨死江濱。右項羽
辟穀何曾辟。從遊也未遊。不知范蠡去。何似子房留。右張良
一節軍門入。安劉功不刊。先儒譏左祖。事勢未詳觀。右周勃
舉足分劉項。終憐走狗烹。鄼生亦枉死。應悔襲齊城。右韓信

午日

夢回北牖午風遲。佳節庭前把酒卮。鼻孔塗丹雙子女。舌尖翦血八哥兒。戲藏他日三年艾。笑合深閨五綵絲。更喜謝公饒逸興。東山絲竹許追隨。是日。定齋。招余觀劇。

題清涼寺方丈

宜詩宜客已公房。入室惟聞茗椀香。幸有東坡容膝地。不須四大作禪牀。

蟬

夏木千章暗。高樓噪夕暉。清音宜遠聽。莫向近枝飛。

妾薄命

憶妾深閨裏。明珠羞自獻。幸得執衣巾。棄捐豈所願。蛾眉生嫉妒。疑謗起相尋。昔時青鬢約。今作白頭吟。灼灼路傍花。淒淒當門草。前歡日以遠。後悔苦不早。薰猶不同味。水火難爲儔。何關君薄情。妾命實不猶。

作暖室

西城居士亦何有。病臥三秋守破牖。修蛇赴壑景已迫。寒鵲營巢意恐後。構才不用棟梁木。選匠何必輸班手。重茅覆頂要如瓢。薄板圍腰真似斗。掃除精潔位置新。小架堆書几開肘。一盞溫火供煮茶。半壁青山勸把酒。平生不愛住煖區。於今直欲稱暄叟。此間終日閉春和。門外寒風任牛吼。

古詩爲叔父壽

甲寅

我生幼失怙。笑笑十二秋。帝命世其爵。坐廢歲未周。注。雍正甲辰。先君年十有二。嗣後學與娶。並履承襲公爵。閏十一月坐廢。高堂憂叔父。敦天性。自昔孝友修。以兄愛及子。視我蘭玉儔。坐見婚姻畢。行將藝業優。相依八九載。但覺日月遒。謂當承先志。永託無疆庥。誰知蕭牆變。飛冤起逆囚。前年元咥訟。衛國幾無侯。先祀幸無廢。注。雍正。

壬子。家人班達爾什狀。訟先叔祖。放棄知何尤。我亦遭羅網。芝蕙分同櫛。聖主浩如春。終察覆盆幽。
坐廢公爵。從伯駱公諱達承襲。免其追交。維時避位臣。素服歸林邱。遂成分析勢。居鑿各不侔。一先君。賠交。並稱先祖。亦有未清舊負。講定著落。
 人苟不爭。眾口誰能咻。尚喜籍與成。得遂竹林遊。志願良已足。人事乖所籌。舊負官吏催。遺址不可留。又
賴什一助。價不敷。時因措交賠項。拆屋變價。屋四壁未窮搜。蕭然一身外。受賜如髮稠。每思恩意厚。我力何能酬。今日攬揆辰。盈耳沸羣謳。願我稱觴意。感極恥言浮。古人天降祥。非以積善求。譬彼茨稼者。自有斯倉收。持此壽叔父。歡樂殊未休。坐客前致辭。此理非謬悠。

正月十二日西園見梅是日立春

臘前年後。恩過。杜詩。梅花年後多。始見東風第一枝。應是有心魁萬樹。不關愁睡破顏遲。東坡詩。怕愁食睡。

獨開遲。韓偓詩。曾愁香結破顏遲。

杏花

杏花舊種茅堂曲。三度春風吹葉綠。樹頭樹底幾枝紅。欲開未開可人目。清香浥浥沾衣袖。上有羣蜂鬧
 清晝。護惜應無鳥雀殘。飄零尚恐風雨驟。誰家聯壁賞花回。若箇孤筇藉碧苔。卻因疎懶成株守。相對朝
 朝但覆杯。

月

光景終無改，圓虧卻有期。四時春更好，一夜雨偏宜。纔見移花影，還驚落酒卮。虛牕看未足，鄰笛又催詩。

悼亡

內子于乙卯四月二十七日
棄世。遺一子。名申立。

香奩猶傍舊書廚，長使安仁淚眼枯。觸物頻思白頭約，對人每誦黑心符。牀前匍匐誰當顧，堂上摧頽我獨扶。兩地關心應有恨，可能瞑日向泉途。

英石小山二首

窺豹管中見一斑，兩拳瘦石自成山。迂行數步閒安置，便有茶煙縮作鬢。
杜家一簣依然土，蘇氏三峯未是山。何似幽齋牕外石，坐移大小兩煙鬟。

遊聖感寺

神京右臂西山尊，佛舍三百孰窮源。翠微之坡聖感寺，我來覽勝偕弟昆。少憩龍泉鑑鬚髮，行穿松徑豁塵昏。笑語不知烏引路，逢迎早見僧應門。殿閣峩峩倚霄漢，軒廊翼翼通山園。正欲禮佛瞻師座，卻見題壁訝蜂屯。俗書昨視意先厭，惡詩細讀心滋煩。打油釘鉸不忍道，弄麀伏獵何足言。惜哉何人留佳句，橫遭塗改如金根。大書姓字示來者，意欲留待知音論。比來客子好遊玩，東西車馬爭轟喧。紫脂紅粉無虛日，污鱗清淨真少恩。我願天公十日雨，爲洗終古山水冤。雲峯煙樹出奇麗，幽懷爽氣快吐吞。未妨沾濡累童僕，祇恐驚占愁獐猿。綠篔青笠吾往矣，遍收景物歸清樽。

伏日

新陰撼老陽。不勝成初伏。平生苦炎熇。與世異趨逐。茲當避鬼節。猶然從古俗。瓜果陳小庭。湯餅隨所欲。飽餘閉戶臥。襟襟莫相觸。

守歲閨詞集唐

一想流年百事驚。夜深無語獨含情。近來欲睡兼難睡。斜倚熏籠坐到明。

遊清涼洞二首

北山秋未老。攜伴共幽尋。見說清涼寺。能消塵俗心。水泐餘虎跡。黃泉峪觀虎跡。石路隔蟲吟。乍喜逢僧話。停

驂紅樹林。八家村遇清涼寺僧。

湖口看將近。山腰行欲中。鼠毛盡蒼老。鴉嘴獨鮮紅。山多蒼鼠。鴉嘴皆紅嘴。巨石天開空。旁門路不通。洞旁有穴。異時重到此。五月聽寒風。

春寒

戲問中庭桃李枝。今年何事獨開遲。司花不欲春歸速。特借寒風十日吹。

送春

春光九十日。倏忽去悠悠。燕自銜泥嬾。鶯徒擲柳工。數番榆莢雨。幾陣楝花風。誰殿羣芳後。雕闌芍藥紅。

寄答全謝山吉士

詩人磊落何代無。平生服膺杜與蘇。邇來閉戶讀遺集。忽忽不知歲月徂。師心學古空憤悱。誰當爲我舉一隅。卽今咫尺杜蘇在。聞風不往胡躊躇。先生笑我稱詩臆。貽詩細與開迷途。少陵碧海掣鯨魚。長公萬頃波瀾殊。驪珠滿眼欣在握。拜手捧誦還嗟吁。但恐身微志空大。有負期許將何如。先生才氣雄萬夫。詞場騁轡猶其餘。志業未就坐名累。轅軻未若迴巾車。折腰五斗非吾事。幡然歸養田園居。先生不就縣令之選。歸養二人君不見纓冠峨峨來于于。賢如昌黎三上書。

內子亡二年。婦翁福公欲以族女許余繼室。不知余不娶久矣。記初爲翁壻時。見贈扇上詩。有風流

衛玠之句。似爲內子天亡之讖。歸檢篋中。復有所感。作詩寄翁。注。先外祖諱福。飯伊。喇里納喇氏。

非秦難稱岳。除巫不是雲。自知非衛玠。所愧負將軍。開篋尋詩扇。移鐙見繡裙。淚從初沒盡。感念更紛紛。

贈全毓峯

我昔兒童歲。雙眸何所同。珠懸漢曼倩。電爛晉王戎。銀海波新漲。銅關寇屢攻。相逢羞月姊。見戲惱天公。故友傳神術。旁方擅聖功。河渠洪水靜。山徑塞茅通。積垢辭青鏡。浮雲淨碧空。讀書緣未了。持此感何窮。

夏夜卽事

藤牀竹簟生風漪。單衣小扇夜坐時。上有揚輝之古月。下有無波之綠池。洗盞池邊自斟酌。幽懷獨愜無

人覺飛鼠捎簷月下翻。流螢度檻花間落。

九兄送槿一本。詩之牆陰。一花開可數日。因悟槿性見日則易落耳。

木槿如冷人。僻性畏趨熱。託根或非地。衛生每苦拙。幽齋牆之陰。植根適欣悅。曾無炎曦照。唯見露華澈。紅芳久葳蕤。碧葉何鮮潔。坐令瞬息花。欲知晦朔節。向陽易爲春。近水先得月。人情自古然。何怪難識別。

雨中讀書

凝雲曙後合。俊雨秋來盛。俗謂秋多雨爲秋俊子。無力致羲和。且當尋孔孟。紫茗漱清甘。烏皮俯深淨。微吟饑鳥和。快誦簷溜應。立見心志專。坐覺衣冠正。開卷已收益。掩帙猶生敬。午棋携蒲儕。卯酒刀箭橫。三餘不吾欺。萬事無此勝。

中秋無月

夕陽暗落雨霏霏。寒倚虛牕酒力微。不恨連陰同萬里。惟愁三序隔孤輝。吹雲南郡其人遠。玩月天峯此事非。憑仗新詩爲推轂。嫦娥速送玉輪歸。

月出九兄見過

萬里陰晴此夕齊。月明同玩鳳城西。景方天柱開樽賞。曲譜霓裳索紙題。九兄有詩。已滿三人休顧影。未交午夜莫愁雞。憑闌久對光逾朗。無奈相看醉似泥。

題山中舊主人壁

矮屋頽垣接水涯。經年不到野人家。尋山馬上雨初過。留客村間日易斜。愛潔从餐陶令菊。耽閒欲種邵平瓜。向來幽興猶能記。倚杖柴門數亂鴉。

我有平生好二首

我有平生好。嵯峨蒼翠邊。遊心惟水石。過眼足雲煙。不覺牽詩思。真堪作畫傳。何當結茅屋。習靜謝塵緣。我有平生好。清漣浩渺邊。笑堪魚戲藻。坐愛鷺翻蓮。沙淺纓堪濯。堤平纜可牽。何當羅酒盃。拍伏畢家船。

聞雁次張濟川韻

底事披衣自啓扉。爲聽嘹唳雁飛飛。往來南北家無定。去就寒暄時不違。少婦蘭閨應怨別。征夫榆塞正思歸。秋聲月影清人思。自覺中宵酒力微。

春陰

香車寶馬滿春城。盡道遊春未放晴。我愛養花天氣好。密雲微雨近清明。

送人遊西山

西山三百寺。位置隨淺深。出郊一以眺。但見白雲岑。白雲何悠悠。下有松柏林。寂寂高僧居。幽人時見臨。惟彼當途士。各有住山心。至今巖穴間。常稀車馬音。君今屬閒遊。奚囊攜素琴。朝爲山中行。暮爲山中吟。

十月以爲期。到處窮探尋。嗟余弗獲俱。相送情難任。

月山詩集二

八十七首

戊午正月。余具狀請開業于宗學。以三月十一日得入。書呈同志。

小園奉母近西城。擬賦閒居久未成。一卷那甘執耜老。十年渾忘袞衣榮。青雲有路逢新命。玉牒多才愧後生。莫恨歲華空老大。遺經尙想繼家聲。

上孫載黃、沈椒園兩先生。兩先生並以翰林院編修。領宗學事。

自嫌經術未研尋。壯歲來遊翰墨林。共聽鱣堂敷訓切。就中蒙滯最傾心。

贈薰之兄。諱德泳。

弟兄兼友誼。坐對別賢愚。我苦從師晚。君應聞道先。抽毫高藝苑。探篋足詩篇。銳氣旌麾抱。相期日勉旃。

讀書

朝向學中去。暮從學中歸。直以讀書故。飲膳與親違。上堂面慈顏。問兒何所爲。良師垂模範。益友進箴規。餘力事弓馬。專功在書詩。不墜先人緒。庶免母心悲。

寄孫載黃、沈椒園兩先生。余因曾。龔公爵。被出。兩先生俱以事不至。調焉拜別。翌日獻詩云爾。

登嶽小陵邱。觀海小溪澗。恭惟兩先生。學行儒林羨。嗟我向立年。始解愛文翰。宗覺得請業。傳習日忘倦。謂言荷鈞陶。庶可齊時彥。讀書曾被棄。有志誰當善。一廢便終身。再來真覩面。上孤明師訓。下負平生願。元豹行當隱。猶龍不可見。迴首望宮牆。邈然隔雲漢。

次答育萬同學。卽題其集端以正。

沈廷芳

天尊異凡葩。銀潢非曲礪。卓哉真龍種。篤生有令範。挺立英多姿。操觚工染翰。勤學趨宗鬣。精研力無倦。儒雅得斯人。詎愧邦之彥。手詩頻請業。流派與深辨。顧茲拳拳衷。抗顏慚北面。一朝舍我去。自云違夙願。閉戶功倍多。豈在日相見。學海正靡涯。津梁溯雲漢。

椒園先生以詩見慰。仍用前韻奉答。

鷗鷗志摩霄。騏驥思躍澗。飛騰各有時。躁進非所羨。讀書求聞道。寧爲弄柔翰。聖域未由窺。化雨元無倦。憶昔趨函丈。濟濟羅羣彥。紫陽師道尊。白鹿學規善。窮理分四目。獨行當一面。我請事斯語。窮達不易願。新詩慰岑寂。暫此如相見。終輸坐間人。差勝門外漢。

寄學中諸子

歷朝試法誰定美。可惜朱明輸趙李。只聞歲俸裁將軍。不見王孫成進士。聖朝文治超前代。教養先施本支內。兩翼鸞宮憶舊恩。五年選舉歌新惠。世宗憲皇帝始建宗學。今上親定宗室考試法。舊恩新惠總難忘。諸生何以報吾皇。

惟應砥礪青雲器。異時共著邦家光。我生矢願老一卷。幸際文明敢息偃。竭來問業學中趨。惟恨流光已
晚晚。文威注。諱。時五注。諱。兩白眉。筆力可卻千熊熊。機雲持論誰當過。軾轍讀書不暫離。薰之邊
幅頗修整。作詩愛與西崑聘。鐵石相公賦梅花。山斗先生傳毛穎。三子才名久鼎立。一爲吾兄兩吾姪。自
古同志卽金蘭。況乃一姓爲膠膝。浮沈睽隔恨無窮。角射分題誰與同。託根雲漢恩原渥。枯枝無分拂春
風。

秋日讀東坡送晁美叔詩有感。因用其韻。

東坡有弟我莫儔。尋師覓友職此由。誰能匏繫百無求。寬衣博帶聊束脩。羸童瘦馬宗饜遊。游思竹素窮
墳邱。問事爭笑賈長頭。歸來荒庭雜樹秋。依然幽壑蟠潛蚪。此行大錯悔且羞。有如聚鐵鑄六州。覆水一
覆不再收。堂上老人爲我謀。十年閉戶爾所優。一任兒曹巧運籌。涇水寧濁清渭流。

方鏡次韻

可是中庭月一方。凝眸相對欲生芒。陽冰有塊千年物。明水無波萬丈光。炤夜孤鐙依素壁。寫秋匹練媚
橫塘。擎來坐使衣冠正。應笑秦宮照膽張。

冬至

佳節銜杯樂事殊。地鑪紙帳似髯蘇。小兒奪我吟詩筆。亂點梅花九九圖。

口號

千街明月九衢燈。踏遍香塵記我曾。誰使銷除結習盡。虛牕把酒聽簷冰。

雨後西園觀劇集李

吾家有季父。閒園養幽姿。東風洒雨露。草木含榮滋。良辰與美景。今日乃相宜。歌聲送落日。舞袖拂花枝。三杯容小阮。七步繼陳思。復如竹林下。名賢共此時。

壽母四首己未

昔年十二三。嬉戲娛高堂。未知袞衣榮。但愛綵繡光。阿母顧我笑。再拜奉瑤觴。屈指星氣流。茲事十載強。惟有孺子顏。不隨人爵亡。早成非大器。幼學須及時。拳拳日服膺。慈訓敢有違。少讀程朱書。兼愛蘇黃詩。興至一長吟。音節頗近之。非以誇詞章。忠孝我所師。萱草生堂北。花葉交輝光。有似綠雲中。黃鸝挾子翔。折花插膽瓶。置酒堂中央。歌舞爲親壽。申以南山章。何用慰慈懷。笑指兒女行。男孫如健犢。束髮心尙孩。女孫如鵲鶯。學語音未諧。繞牀復搖膝。嬉笑相徘徊。坐令白髮人。不飲朱顏開。此樂方日新。榮祿何有哉。

上叔父定齋先生

起居相對水雲閒。門掩蒼苔錦石間。日下曝書防蠹毀。雨中護竹怕童頑。元知阮籍詩難繼。尚喜劉安桂
許攀。聞道山僧新送藥。豨蕪端可駐朱顏。

小犬

小犬臥前除。君看何所如。銜蟬形略近。逐兔計全疎。可喜諳人性。須防裂客裾。兒童偏解事。作使駕鳩車。
賦得滿城風雨近重陽。呈定齋叔父。

風風雨雨阻登臨。愁坐空堂霧鬣沈。萬戶寒砧扶溜急。六街曉騎怯泥深。白衣未覺攜膠至。黃菊何須買
棹尋。煙景西園明月好。棲霞亭上望雲岑。

病中感懷

風急雨侵帷。寒宵不寐時。空牀悲騎省。埋玉痛元規。婦翁福公
新葬。病久詩全廢。愁多酒不辭。無情是藥物。眼

暗總難醫。

贈僕

由來童僕輩。難得是知音。沽酒歸偏早。聽詩笑不任。花開防雀啄。果熟怕霜侵。穎士才真愧。其如愛我心。

水仙

水石生涯仙子身。芝蘭應許結爲鄰。凌波不著生塵鞮。未要陳王賦洛神。

送凌硯齋先生歸嘉禾二首

不逐王侯客。甘爲弟子師。三年宗學住。萬里旅人思。白髮憂親老。青雲報主遲。聖朝方貴士。莫卽事耘耔。歎息吾師去。蕭然久客身。詩篇燕嶺雪。舟楫越江春。失意今如此。知音復幾人。祇應門下士。惜別一濡巾。

賦得樵李耆英會重送硯齋先生還鄉省親

樵李趨庭日。耆英入社頻。舉家無俗累。接席盡天民。棠棣開新雨。流鶯啼晚春。溪山行樂處。歸奉板輿塵。

臘月對月作

丑月日庚辰。小寒兼臘八。向夕雲鱗鱗。半月光汎汎。初如玉弓引。漸若冰藕滑。破鏡乍開奩。埋輪未沒轄。佳節旣已臻。清景亦難愒。空庭寂無人。風竹時敲戛。美此勸酒船。可無遺愁刷。呼童倒春甕。百壺供喫嚼。坐覺烏帽偏。笑捥吟鬚茁。月落我亦眠。晨雞勿啁哳。

守歲行

君不見昨日小雨何霏微。天公迎春春未歸。又不見今日狂風太慄怒。天公送臘臘不住。何如不送亦不迎。一任春來臘自去。琥珀酒。玻璃杯。高堂守歲更鼓催。稱觴介壽拜家慶。兒女嬉笑慈顏開。坐久雲輕衆星出。城中爆竹殷如雷。當筵老嫗前致語。新年喜事吾能數。四海昇平百穀登。五日一風十日雨。郎君胸

羅萬卷書。大姑針黹天孫如。是時祝頌亦到我。意雖甚厚非吾須。一杯相屬君聽取。浮雲富貴焉足娛。我亦不願袞衣九命朝中趨。我亦不願金釵十二房中居。但願年年此夜閒無事。奉侍慈闈百歲餘。

人日酉時立春

寒退斜陽外。春生片月中。菜羹宜晚食。花勝稱閒躬。嗜酒侯彭老。工詩戴幼公。平生爲佳節。醉詠興何窮。

十四夜月五首

高城半吐月。臙臙殘照猶餘樹。杪紅最是幽人無箇事。巡簷倚遍試鐙風。當軒一榻置烏皮。半爲開樽半賦詩。記取草堂明月下。三年坐度看鐙期。也知獨酌易爲醒。取醉何妨倒百瓶。明日陰晴誰料得。深杯到手莫教停。月明小院林煙澹。風靜虛牕夜氣多。忽憶西園老居士。紅鐙影裏唱吳歌。

謂叔父。

十五夜月

前韻

輕寒料峭卻無風。飯罷高堂蠟燭紅。昨夜中天一輪月。黃昏依舊見臙臙。員魄欣逢三五期。染毫重續舊題詩。祇緣貪看蟾蜍影。不覺清霜濕地皮。快吸鵝黃未肯停。旋呼童子夜提瓶。東風九陌吹人醉。朔雁三更叫月醒。

韓昌黎詩。榆莢車前蓋地皮。

懶怕出門貪客至。醉能得句索人歌。四時景物三元月。惟有今宵佳趣多。九兄夜過。
隱隱疎鐘出鳳樓。寒生半夜擬添裘。玉山雖倒眠猶未。閒聽歸人說勝遊。

贈陳咸中

薄俗誰同調。如君迥出塵。術從盧扁得。學比陸王醇。傾蓋成知己。抽毫願結隣。平生金石契。強半布衣人。
讀烈婦焦氏絕命詞。因用其韻八首。

盡日無人自惋傷。生離死別總淒涼。閨門留得綢常在。一幅詩箋萬段腸。
避債無臺那避諱。釀成奇禍重咨嗟。那堪一夕風兼雨。摧盡枝頭連理花。
勝負知誰得算多。囊中金盡意如何。釵裙篋笥都無問。須念隨珠不受磨。
可憐孤注是紅顏。今古無如妾命艱。一片牛衣消不得。留君看取淚痕斑。
消魂時節斷腸天。幾杵林鐘夜屢遷。自是離人愁永訣。不因風雨也淒然。
百尺高松弱蔓依。豈知柯葉歲寒非。春風不爲甦枯槁。何事朝來入枕幃。
命薄如斯誰復知。白頭有約不同歸。生憎比目成雙泳。不分鴛鴦作對飛。
臨歧絮絮太癡生。不愧鬚眉在此行。莫把新詩比蘇蕙。輸他錦字倍多情。

法天上人自盤山來訪定齋叔父。誤詣敝廬。公以他出不值。歸而悵然作三絕句卻寄。

欲識高僧會面艱。忽聞訪友到塵寰。分明五柳先生宅。不見陶潛處士還。謂叔父。
白石蒼苔小徑幽。何妨看竹少淹留。恰如雪夜山陰道。訪戴輕回王子猷。
明珠應惜暗中投。回向深山古澗頭。一片閒心誰繫得。白雲東去自悠悠。

贈法天和尙兼呈李眉山

法天上人七十餘。頽然鶴骨清而癯。挂錫盤山四十載。獨向西甘泉上居。我聞真僧多逸友。名山不乏高賢廬。三盤奇勝盡君有。其中人物復何如。眉山處士真鴻儒。三間茅堂萬卷書。已公屋下詩堪賦。遠公社中酒可沽。山水徜徉盤谷李。文章遊戲眉山蘇。風流高尚兼二子。別是人閒一丈夫。君不見朱太史。三尙書。拙公當年稱知己。曾到盤山少住無。

煙草次韻

異俗誰傳遍四垂。紛紛茹苦勝含飴。爲貪雲霧生衣細。不藉壺觴留客遲。銀管幾燃渾致醉。烏絲一縷欲忘饑。韓公愛酒難兼得。笑殺沈吟去取時。韓宗伯墓廬。煙酒兼嗜。或問必不得已。於斯二者何先。宗伯笑云去酒。

檳榔次韻

鳳卵雞心手自將。逢人嚼木是尋常。有功爭及杯中物。鷓林玉露。嶺南人以檳榔製茶。其功有四。醉能使醒。醒能使醉。饑能使飽。飽能使饑。
無病何須肘後方。山谷幾道復覓檳榔詩。逐水排痰肘後方。地繞幽并千里近。風移閩粵百年強。愛他宋日番禺守。久住蠻

煙不一嘗。

過大兄舊堂有感。注。先伯諱壽達。先三伯祖子。

昔日吹堦地。人亡有故琴。紫荊餘弱幹。鴻雁足哀音。坐久雨聲急。歸遲暝色侵。感時兼觸物。惆悵一何深。

白翎雀

慧甚白翎雀。能為百鳥聲。應含無限意。莫訝不平鳴。羞逐烏啼夜。竇白翎雀者。便一文不值矣。一作烏啼聲。便一文不值矣。欣同鵲報晴。學鵲聲。從前箏笛耳。為爾幾回傾。

夏日閒居詠志五首

休羨河間名位尊。傳經竊比楚王孫。十年無復金門夢。獨抱遺編細討論。斷酒關門聽雨眠。從教四壁篆螭涎。遮明步障真無用。一炷濃香養病天。杜門何物最相宜。半架殘書一局棋。閱罷南華神欲倦。何妨坐隱是吾師。驚喜高堂鶴髮初。祇應養志是閒居。園林長夏多佳致。日夕兒孫奉板輿。開堂不羨水雲鄉。習射相過有雁行。賭取佩刀催換酒。不知疎柳掛斜陽。

題瓊花夢傳奇

玉堂才子譜新聲。一曲瓊花四座驚。同是揚州同是夢。令人重憶玉池生。

東便門外觀荷二首

路傍芙蓉池。花似御河裏。君欲覓源頭。試問城中水。
翠蓋倚紅妝。行客不知賞。頗聞好事人。載酒夜深往。

賦得梧桐月向懷中照

高梧澹疎影。一樹月明中。秋色經時老。寒光入夜通。舉杯驚激灑。解帶見玲瓏。相對清人骨。冰壺坐臥同。

壽叔父二首

辛酉

好古寧嫌癖。逃名自有方。論詩宗白傅。顧曲比周郎。一榻憑誰下。三杯任我狂。年年竹林宴。染翰意何長。
得遂田園樂。何妨城市留。門無彈鋏客。家有貯書樓。北郭春前獵。西山雪後遊。從公高宴罷。策馬共尋幽。

臘日

歲晚餘茲節。梅花媚草堂。臘前春已動。至後日初長。祠祭時珍改。家筵新酒香。老親猶健飯。就養幸無方。
辛酉除夕

三十明朝是。蹉跎恨有餘。過期年共改。名笑日應虛。徑少相知友。家多未讀書。平生圖不朽。壯歲計仍疎。

壬戌元日叔父命賦春雪詩

得飛字

殘臘春先入。新年雪始飛。去年無雪。除夕立春。椒花嫌色重。爆竹恨光微。比德人猶愧。知音時已稀。塔前森玉樹。

誰道謝庭非。

人日卽事有懷叔父八兄注。先八伯父。韓琦先六伯祖子。

閉戶數聲啼鳥登臺滿目雲山借問軟紅塵裏幾人人日能閒。

西廟遊人散後是日開八兄往護國寺。南屯獵騎歸時時九叔父在南屯放鷹。明月兩鄉共對酒杯三處同持。

擬古贈凌夫子

選材棄松楠觀象遺羲娥。鑰拓混南金。稂莠隱嘉禾。傷彼荆山璆。所遇非卞和。世豈乏孫陽。驥足竟蹉跎。知音不在茲。誰聽陽春歌。

灤河漁隱子族叔也。有草堂在偏涼汀。定齋叔父永平之行。往訪之。遂觀打魚。留數日。有詩紀事。命予和之。用西堂集中韻。

隱者柴門接大河。尋山有客此經過。暫拋靈運雙遊屐。來伴天隨獨釣蓑。扶杖不辭流水遠。得魚爭羨主人多。只應設餼能留宿。惜別何須借魯戈。

贈竹堂僧二首頃以詩畫見贈。故詩中及之。

古洞安禪久。閒雲出岫慵。言尋竹林客。來聽鳳城鐘。水石盤中勝。麈尾戶外蹤。因君話奇賞。神往最高峯。雅況詩兼畫。今無古或同。惠崇小景妙。懷素草書工。五月松風冷。三春杏雨紅。憑君寫新卷。添我此山中。

自去歲五月先太夫人卽世。哀毀之餘。病幾不起者屢矣。今年夏復脾泄月餘。兼苦健忘。追念慈訓。守身勤學。兩恐無成。泣血而作。

欲寫終天恨。悲來輒復休。親難將死代。歲不爲哀留。久廢書渾忘。相仍病未瘳。無能成母志。身後更貽憂。

贈李坤四宗潮

城南邂逅卽乖分。妙論經年喜再聞。禮略主賓能恕我。學兼師友總輸君。爲人苦有冥搜癖。傳世應無科舉文。好事尙容來問字。便當載酒過揚雲。

叔父遊房山得詩七首謹次韻

爲訪休明舊隱山。嶄巖歷遍未能閒。何年荒草迷祠墓。當日諸生列珮環。高節愈因衰世見。禍機已伏盛名間。聞公頌罷懷賢句。豈待登臨始愴顏。右六聘山

蚤歲詩登作者壇。高名千古並郊寒。三車法已皈依佛。一字師終邂逅韓。蟬病難飛吟得謗。鸞棲非所罪除官。獨憐石室苔封後。絕域魂歸路窅漫。右賈島

雙厓峭立勢雄哉。梵宇琳宮相望開。老樹千章垂澗霧。流泉三疊輓山雷。濯纓客避龍眠處。採藥人逢虎跡迴。我欲此間結茅屋。放情巖壑日銜杯。右南北

孤峯峭劣入煙霄。有客相攜到上標。濟勝具惟一編屐。壯行酒可十分瓢。金錢挂樹寧辭費。凡登者必挂

曰搖錢樹。鐵樹懸梯未怕搖。一笑臨風凌絕頂。還勝前度望中遙。右摘星陀。

秉燭空嵌一探奇。僧閒煮茗待多時。依巖茅屋石為壁。臨洞蘿門雲作籬。替客自矜出壑早。叔父詩。有

入壑之句。是遊二替。未及洞之半而返。健奴私恨入山遲。叔父詩。有奴子就。遊步入遲之句。三人苦樂雖殊狀。衣袖煙煤一例攜。右壘

異時有客此逃禪。歸後常將勝蹟傳。飯熟齋廚鐘韻遠。經藏洞穴塔形圓。一林香樹猶唐物。幾曲清溪非

晉年。最是山巔峯嶺秀。至今人說小西天。右西城寺。

聖代河清瑞已奇。房山復見鳳來儀。鳴岐堪媿周文世。集樹寧誇漢帝時。頌德乍刊如雪石。選材還伐拂

雲枝。亭空鳳去君無恨。猶有耆民是見知。右鳳亭。

叔父遊百花山歸次韻紀遊詩三首。

歸自山中纔五日。飄然又作入山人。隨時行樂誰能似。十二年來自在身。

板橋村寺古時泉。楊柳陰深聽暮蟬。更擬入山尋勝賞。獨騎羸馬萬峯巔。公三宿板橋村始入山。

溪邊紅蓼受風斜。髣髴桃源萬樹花。古寺僧閒人至少。留賓一椀本山茶。

月山詩集三

八十二首

南海子道中

不識羊房路，驅車南苑來。言從吳殿過，吳殿在南苑中。明時行宮也。懷古一低徊。短草驚麋竄，春風旅雁回。紅門看不遠，已度晾鷹臺。

上沈歸愚先生二首

四海知霜鬢，鴻名仰碩儒。文章當代少，道德一身俱。居擬談經宅，門多問字徒。西清饒述作，已就太元無。史才班馬匹，詩格杜韓雙。天子呼名士，何人意不降。高山欣可仰，寸莛敢辭撞。應似漁洋叟，從遊有紫幢。歸愚先生歸，薰之有詩見示，依韻和之。

楚楚松樹子，合抱嗤楓柳。用孫綽語雖無梁棟姿，幸近幽人牖。養視異凡木，栽培託不朽。復有孤生竹，同岑結爲友。逸勢未凌雲，秀氣已衝斗。相期傲雪霜，青青歲寒後。時雨日以滋，春風若相誘。有時清籟發，不異虛壑叩。滄波起微涓，崇山始培塿。他年根柢深，會見龍蛇走。

芳草次薰之韻

穠李天桃各鬪新。閒庭草色喜初勻。青連陶令門前柳。紅避劉郎陌上塵。冠蓋勝遊終恨俗。池塘好夢不妨頻。鋪茵嫩綠聊堪藉。雅稱如泥爛醉人。

感物次薰之韻

幽人澹無營。擁書坐茅屋。長日不停吟。短夕猶勤讀。一燈耿虛幌。載籍姿遊目。未惜蠟成灰。從教煙似爨。移時微涼生。稍覺夜氣撲。流螢入戶飛。棲鳥依枝宿。動定雖異情。遊止愜所欲。何來拂燈蛾。捐軀赴炎燠。豈欲資氣焰。蹈火恐不速。吟君感物詩。令我三歎伏。

送歸愚先生典試湖北

盛世搜賢帝網恢。儒臣銜命敢遲回。作人壽考歌周雅。報國文章藉楚材。去日正逢梧葉下。歸期已過菊花开。春風座裏橫經客。準擬師門立雪來。

賦得水態含青近若空

一泓秋水俯昭融。勢與澄潭萬頃同。點點螺青遙映岫。鱗鱗鴨綠細含風。比心自愛清無底。寓目應知色即空。卻笑雲容多變態。白衣蒼狗倏西東。

駿馬行

衛文駮牝歌三千。魯僖駟牧詩人傳。不惜千金求駿骨。燕昭以此羅羣賢。我逢驥子憐神俊。眼有方瞳雙

耳峻龍鬚風臆骨相殊。昂首悲吟思戰陣。驚駘尙爾効騰驤。豈有驂騑棄路傍。驥兮善保千金體。卽今相馬有孫陽。

詠老少年三首

衣裳何楚楚。豔質誰裁剪。儉開學少年。老子興不淺。

朱顏歲晚長在疑。有金丹駐年。錯認花中眷。屬合稱草裏神僊。

雁來時節欲霜天。一徑新紅破曉煙。恰稱閒居人讀易。研朱滴露小窗前。

和韓秋懷詩十一首

驅車東郊道。黍稷何薺蕪。秋來風雨時。成長方靡已。歲功雖未收。農歡已在耳。停驂暫借問。野老見客起。今年夏苦旱。聖主憂無似。至誠格天心。沛澤終可恃。行觀晚稼登。玉粒走萬軌。饑歲逢有秋。豈獨農人喜。庭草秋始芽。未霜旋復悴。幸逃耘鋤厄。託根雨露地。霑潤旣已渥。怒生頗自恣。易發還先萎。常理豈有異。人生無百年。不朽以爲貴。

於耳絕絲簧。在目無韶曼。病喜蘇秋風。歸非戀菰飯。閒居二十載。未負平生願。愛此清商候。不作蕭瑟歎。飲酒爵止三。觀書卷盈萬。幽事可自娛。至樂將誰獻。優哉復遊哉。無求亦無怨。我心一何潔。清冷如冬凌。我足一何蹇。癡鈍如寒蠅。潔旣汚莫合。蹇亦捷所憎。田園聊自息。攀林坐石稜。

鳥倦常栖樹。魚潛不窺罾。杜門勿復出。清時養無能。

白雲映空流。獨鶴帶露警。候變知節逝。漏長識夜永。乘興自斟酌。酒酣氣益猛。防身有長劍。利物乏修綆。清秋信可樂。豐歲竊獨幸。飽食終吾年。世事盡可屏。

衆星羅天垣。明月皎夜景。月出星斂芒。月入星吐回。浮雲從何來。憑虛忽作梗。上下恣蔽虧。東西互馳騁。我欲力排之。天高末由請。

有客過我廬。論詩至日暗。趨同調自合。辨析兩無憾。漢魏難仰企。梁陳敢俯瞰。盧駱矜富麗。王韋造平淡。李杜集大成。齊名匪忝濫。錢劉格稍降。流覽亦許暫。韓公力最雄。奔舟不可纜。寒瘦詎爲辜。輕俗宜免勸。子瞻如可作。罰之飲一甌。

有子曰卓立。七歲賦高軒。坐使父執敬。不隨羣兒奔。王母夙鍾愛。朝夕侍笑言。稱觴拜我後。戲綵舞我前。東髮就家塾。發憤嘗忘餐。讀書滿數篋。有作成一編。前年忽夭折。注。乾隆庚申卒。時年十一。思之痛萬千。秋風感我心。竟夕聲悲酸。汝弟始扶牀。注。先仲兄是時五齡。是時方熟眠。縱復能成立。遲汝十一年。

泛舟城東水。酒清殺復乾。十里鋪鏡面。青瑤映明珥。主人勸客飲。列坐鼎足圍。興酣各賦詩。一字期吟安。鳴蛙喧遠岸。遊魚吹細瀾。笑指能言鴨。王孫慎金丸。清遊難屢得。明晨理歸鞍。肅肅飛鴻羽。唧唧吟蛩聲。哀音良夜發。側耳最分明。黃葵生北牖。獨抱傾陽誠。白日未及照。冷露皓已盈。

商飈入庭樹。鐸若萬甲兵。性定齊慘樂。心空忘衰榮。寄言悲愁客。勿爲秋所令。
中秋日以近。月色日以好。開尊招親舊。歡賞恐不早。圓虧各有時。晴明焉常保。撫松羨後雕。攀柳知先槁。
人生行樂耳。此語吾解道。

牽牛花十韻

秋色疎籬外。開時露尙含。離離蒼玉珮。瑟瑟碧瑤簪。作瓣花無一。抽尖葉有三。避炎先自斂。結子不妨貪。
賞是幽人獨。眠應俗客慙。詩翁曾表宅。迂叟尙留菴。栽可修篁並。名將列宿參。服箱貽誚誤。入藥奏功堪。
採摘時猶待。淒清性所耽。等閒兒女手。未許輒相探。

秋原閒眺二首

紅樹連村迴。黃雲負郭垂。原居賈島句。野望杜陵詩。日下蟲聲急。天高雁去遲。我知秋興逸。搖落未須悲。
秋原時極目。風物復如何。北浦浮雲起。西山爽氣多。村童爭撲棗。田父欲收禾。應笑春遊俗。駢闐車馬過。

古鏡

君不見呂公面大如樸子。安用鏡照二百里。又不見范公古鏡稱絕奇。一日能報十二時。古人作事各有
以。辭鏡藏鏡誰敢譏。薰之吾兄真好古。家有寶鏡壽光伍。書來乞我作長歌。此物不可無君語。嗟余未覩
古鏡形。試問此鏡有何靈。得非鑄從師曠手。不然製自軒轅廷。五色盤龍鏤何代。千年奇字誰所銘。蝕隨

躍靈可許見。鳴如清磬或會聽。解救疾疫勝藥餌。驅除魍魅同雷霆。竊料二者必處一。豈比凡鏡徒熒熒。我目未見百鍊質。心知奇物藏君室。愛惜休教輕示人。濟時利物當有日。戲作此詩君一笑。范公千載有同調。異時作相卻饋遺。應識呂公言語妙。

茱囊三首

楚客充幃怨。唐宮頌管恩。何如兩相忘。伴我菊花樽。李適詩。茱萸房頌綵。

摘處寒生翠袖。盛來嬌映紅紗。射覆不逢郭子。登高好繼桓家。

名馳絕域辟邪翁。知己千秋小宋公。自信調羹有能事。請從今日處囊中。

詠糕

酬節無珍品。蒸糕糝棗紅。衡山書可易。夢得句難工。味入餽飴美。名傳柅杖同。年年黃菊甕。爲爾片時空。
以書易糕。文待詔事。

九日用少陵寄岑參韻

黃花閒淡姿。於我似故舊。每見輒入詩。苦吟身爲瘦。今朝開正好。閉門賞晴晝。時無孟浩然。誰復解相就。小園多槐柳。搖落不可救。葉散霜氣淒。林疎日光漏。維時雁賓秋。兼知豺祭獸。回思少年時。鞍馬狂奔驟。呼鷹亂山峯。射鴨野田溜。習氣久已除。味古耽幽秀。盤中羅棗糕。甕面傾菊酎。何用酬良辰。嵐光滿襟袖。

紅葉

寒林多麗景。有客爲停驂。樹樹秋聲滿。枝枝春態含。如花開澗北。似燒遍山南。坐覺朱霞起。遙將碧落參。珊瑚擎百尺。錦繡被孤嵐。幽愛長松映。明宜曲水涵。耐寒聊伴菊。出色本從藍。杜牧詩初就。香山酒正酣。酡顏相對處。清賞愜幽探。

楓葉

離離一樹晚楓垂。搖落天教獨後時。冷到吳江人去遠。秋生秦塞雁來遲。暮煙疎雨偏多感。綠樹青山未是奇。得句寒林休覓紙。徑須拾葉一題之。

月夜對菊

重陽過十日。芳菊欲殘時。追賞那無酒。登高合有詩。依然經雨色。前數日好在傲霜枝。明月離邊影。何人獨爾思。

松濤次薰之韻

何須亂耳奏絲簧。坐愛松聲撼客牀。萬壑風生吹自韻。千巖雨霽洒猶涼。鏡塘雪浪林端湧。巫峽銀濤夢裏長。畢竟清音何所似。是喧是靜辨微茫。

賦得漏聲遙在百花中二律

紫禁千官待漏同。遙聞銀箭報花中。隨風暗遞鈴音細。催曉平分鶯語工。滴盡幽香疑接葉。聽殘餘韻尙飄叢。玉墀劍珮聲相應。解使臣心敬在公。

報曙瓊籤何處鳴。百花叢裏聽分明。穿枝絕勝遊蜂鬧。拂蕊寧教夢蝶驚。弱幹覆邊音杳杳。暗香飄處韻丁丁。催將鳳闕冠裳集。併入簫韶九奏聲。

風摧庭菊殆盡。用少陵茅屋爲秋風所破歌韻。

東窗日白林雅號。居士偃臥三間茅。有如瘦馬嘶寒郊。忽驚撼屋風蕭梢。波濤萬頃翻檐坳。南箕簸揚不遺力。荒園草木遭戕賊。起視槐柳餘空株。竹枝摧折救不得。就中芳菊可痛息。籬邊狼藉無顏色。黃花慘淡葉深黑。直疑風伯心似鐵。粗豪不惜風景裂。秋深漸知陰用事。姑緩數日亦佳絕。菊本後雕乃先萎。含情欲訴無由徹。我爲移植盆盎間。手汲新泉洗凍顏。置之案側傍硯山。嗚呼菊兮託根幸在幽人屋。一任戶外狂飈三日足。

大風不止。用少陵柟樹爲風雨所拔歎韻。

終風且暴十月前。空齋枯坐日似年。掀簷穿牖尋罅隙。大如牛吼小鳴蟬。塵沙奔騰萬馬至。隔窗窺視但一氣。慘淡應知白日愁。微茫莫識蒼天意。書生身外無所愛。吾廬好在重茅蓋。敢同宋玉辨雌雄。且學莊周說竽籟。舊時門外生荆棘。一掃嚴威快胸臆。來朝風止盼庭柯。松柏青葱無改色。

花鴨十首

以羽毛知獨立，黑
白太分明，爲韻。

花鴨雖微禽，攤縱備文羽。諒非鸞鳳儔，鷗鷺且爲侶。
莫笑翅翎短，飛騰志未高。泰山寧厭重，輕舉鄙鴻毛。
動息豈殊衆，居然毛羽奇。秋陽與江漢，冷暖自能知。
或謂雞青頭，或言鵝減足。姓字人不知，知我惟我獨。
羣鳧游太液，雷動翔復集。何以草堂前，忘機時行立。
文質相炳煥，判然白與黑。羣如亦何傷，終身不改色。
春鷄在金籠，俗眼不敢白。寵卽辱所存，菰蒲聊自適。
幸有稻梁養，還無鷹隼害。此外復何求，願足無已太。
朝泛蘆塘水，暮宿沙浦雲。幽人池上興，風月與平分。
不是能言者，虛傳善鬪名。清姿謝泥滓，得謗不須明。

又七言二絕

黑白分明弄羽衣，幽人相對靜忘機。天邊應笑隨陽雁，只向稻梁多處飛。
鴨闌教鬪亦何心，祇博區區驛使金。除卻西川杜工部，詩人無復有知音。

南簷曝日用少陵西閣韻

日出東南隅。照我讀書閣。負暄前簷下。方冬寒氣薄。炙背初溫然。着顏漸藹若。有似遊醉鄉。而非麴蘖託。又如浴溫泉。但未濡腰腳。榮比朝陽鳳。冷笑鳴陰鶴。澤沛感自深。德流頌乃作。恭惟義和馭。日日還如昨。天功不可貪。況欲繫以索。但願依末光。長得扶羸弱。

戲詠野人獻日仍前韻

野人負日暄。不羨紅鑪閣。轉欲持獻君。此意良不薄。君家宮室密。簾幕垂若若。熊席復貂裘。毛深溫可託。餘波逮臣下。陽和疑有腳。矯矯立仗馬。昂昂乘軒鶴。併在春風中。嚴冬寒不作。豈若爾農夫。衣麕常如昨。茅簷霜淒其。甕牖風蕭索。不有黃綿襖。轉慙悲老弱。

荃牀限肴

芳草幽人供。攜持自遠郊。洗心欣靜玩。在寢敢輕拋。密坐情懷洽。高眠臭味交。長疑香滿室。豈歎化爲茅。侈惡牀名象。寒嗤帳號蛟。編荆人共賤。支木客爭嘲。沈水羞頻屑。珊瑚擬碎敲。偏宜蘭席蔽。兼稱薛帷包。小几陳醕醢。朝盤設蕙肴。加餐聊坦腹。行樂是天教。

霜月二首

吾廬霜月夕。清賞更無倫。寂寂懸冰鑑。輝輝散玉塵。依林無一葉。對影有三人。肯使樓南客。嬋娟句自新。

用玉溪
詩語

朗照知人哲。凝陰挫物威。祇貪清徹骨。敢恨冷侵衣。滅燭光逾皎。飛觴興不違。夜來關戶臥。疑是玉京歸。

蒸瓠二律

漑釜燃薪煮扁蒲。筠籠氣上熟斯須。姓名誤許同懸瓠。風味偏憐勝落蘇。肉食難逢青眼客。絲瓜合號細腰奴。從來不入詩人詠。知己千秋定始吾。不用磨刀削玉肌。渴塵消盡上匙時。長卿多病欣相遇。故相邀賓惜未知。人乳蒸純終恨侈。葶藶下豉未爲奇。誰言晚食還當肉。見此應令飽者饑。

鰲鶴二律

健翮鋒稜勢欲飛。松巔梅下見應稀。羽衣新把鱗裳換。丁令翻從丙穴歸。曾是兒童皆識面。可能魚鳥共忘機。平生浩蕩江湖意。速化無端橫被譏。孤影踟躕迥出塵。孕從魚腹爾何因。不同海蜃生成幻。恰似溟鯤變化神。丹頂雪衣新換骨。敗鱗殘甲舊忘身。笑他凡鳥空多肉。只解揚州載富人。

凍硯歌用東坡龍尾硯歌韻

書生何物最寶惜。案頭一硯如蒼壁。終日研磨不遺閒。那愁人喚三災石。朝來乘興賦詩時。呼硯近前硯

有辭共君周旋非一日。體有寒疾君諳知。冰心一片清無垢。百井波瀾不復有。耐冷應推四友中。生春須待三杯後。當時落筆浮煙雲。今朝磨墨凝玉塵。誰知深室重簾裏。也有攢眉呵凍人。我有狂言君裁擇。枯腸苦索非良畫。有書不讀負三冬。與我何惜暫相別。

檐雀三首

寒林蕭瑟晚煙痕。無數歸鴉帶雪翻。何似明牕修竹底。一雙瓦雀噪朝暾。鳴儔嘯侶興悠哉。就食堦前日幾回。宇下寄人君莫笑。銜環曾解報恩來。朝遊竹樹暮棲堂。閱盡炎涼未變常。一種依人梁上燕。春秋來去爲誰忙。

送椒園先生巡漕河東

聖王籌輸輓。名臣奉簡書。急公遑念疾。憂國敢寧居。短櫂敲冰處。危隄築埽餘。還將書疏筆。一爲紀河渠。十一月八日望雪

天時有代謝。冬寒固其理。恆燠地氣泄。三農將何恃。今年節候暖。十月草未死。田家望歲殷。從此憂方始。前者仲冬初。有客過我里。言從禁城來。行經玉河涘。西望雪在山。俯見冰生水。因知元陰凝。坐使幽懷喜。昨朝天乍寒。微霰飄復止。一日半陰晴。吟玩成虛擬。今朝密雲布。千里色相似。冷氣侵衣襟。雨雪可立俟。不辭賦詩催。會當把酒視。出門時引領。一飯三投匕。自卯及未申。濃陰但如彼。滕六來何遲。巽二鳴不已。

酒至且盡觴。詩成書滿紙。吾知彼蒼意。戲人聊復爾。

十九日雪

夢回夜向晨。急雪打牕紙。喜極倒衣裳。呼童起出視。積素已逾寸。萬片飛不已。不知起何時。應從夜半始。遙知田野間。一望無涯涘。鋪銀延萬頃。種玉遍千里。撒鹽未足方。雨粟差堪比。冬暖不復虞。豐兆聊可恃。上解一人憂。下使兆民喜。賦詩憶昨日。清賞已準擬。巡檐勞悵望。倚杖煩久俟。有似苦飢人。果腹待舉匕。又如病渴者。救渴思飲水。上天有深意。遲遲非戲爾。鬢髮連晝夜。時至誰能止。流光須厚積。君當識此理。

檐冰十韻

霽後簷疑雨。看天俗慮刪。祇驚風氣勁。漸失溜聲潺。滴水猶階上。懸冰忽宇間。如釵齊露脚。似筍未成班。冷豔排銀筍。幽音碎玉環。瓊枝生自直。白壁淨無慙。林下添新賞。壺中憶舊顏。瓦全慚素志。月映見清顏。幸免唐妃污。休教兒女攀。多情屬詩客。吟玩倚松關。

又冰筍六韻

雪後流澌合。垂冰駕瓦間。駢頭渾似筍。失偶不名繅。借與雕盤伍。寧同玉匕彎。直躬常潔白。饑口任嘲訕。縱乏調羹用。誰言潤物艱。無心媚傾國。纖手莫輕攀。

明牕二首
以題為韻

小牕新寫紙。虛室有餘明。况復朝陽照。兼之積雪晴。硯含洗墨水。几沸讀書聲。隨意添清課。新篇取次成。朝寒不出戶。紅日上幽牕。暖勝含秋月。明于對夜缸。茶煙絲裊裊。竹影雀雙雙。似此天然景。應令畫手降。

丙寅八月二十六日瀛臺賜宴恭紀四首

鳳蓋西華出。蜺旌上苑來。典因惇敘舉。筵爲慶成開。對酒歌麟趾。揮毫費麝煤。天潢風雅盛。獻賦有奇才。海宇承平日。京師大有年。民方忘帝力。主已念臣賢。醉飽羣情洽。廢颺異數偏。仁皇遊幸處。盛事續堪傳。温綸稠疊下。鷄鷲拜恩時。文綺頒中使。精繆出度支。漫誇撒餞會。合詠賜衣詩。此日天顏喜。寧惟近侍知。筵上黃花早。樓前丹桂秋。龍舟來太液。風吹滿瀛洲。雨過稱觴後。恩霑賜宴優。雲中又望幸。早晚五臺遊。

試後偶述呈一二知己

注。先君於丙寅年。應宗室繙譯考試。

問字常思過子雲。主司籬外倍殷勤。文章大塊清寧一。歌詠吾人伯仲分。時繙譯題係存夜宴桃李園序。內大塊文章與吾人詠歌二句。譯處與主司意見稍有參商。幸得齊名逢杜甫。諱廟秦亦被放。故云。杜何勞下第比劉蕡。芳園桃李新陰好。

誰惜枯桐爨下焚。

黃去非見慰再疊前韻奉答

注。先生諱克類。後陞比部郎中。時爲先仲兄貽謀業師。

榮名過眼等浮雲。何事中年進取勤。見獵心情難自止。上竿滋味欲平分。興深細雨春前穎。意敗嚴霜秋後蕢。好把遺經傳子姪。歸來筆硯不須焚。

三疊前韻示敦敏注。先八伯父長子。號懋齋。有懋齋詩鈔。

胸羅星宿氣干雲。年少偏憐好古勤。囊錦探奇常曉出。杖藜照讀每宵分。明歲將入室會試。龍頭預卜魁多士。

桃實行看賦有蕢。明歲完姻。應笑謝元空穎悟。正煩賭取紫羅焚。

四疊前韻示敦誠注。先八伯父次子。出繼先九叔祖子大。叔諱寧仁為嗣。號敬亭。有四松堂稿。

兄弟齊名似陸雲。行年總角學能勤。舊書已解千回讀。疑義從教片語分。觀海故應無衆水。種花還望結奇蕢。莫言文史三冬足。試取蘭膏繼晷焚。

玉泉禪院

道人種松罷。傍水開禪關。春風吹不到。白雲相與閒。偶尋林外約。引我過前山。倚杖看奇石。徘徊殊未還。

南西門外卽目

澄潭初月影微微。雨過涼生透葛衣。十里亂蟬風兩岸。藕花香送釣船歸。

月山詩集四

五十九首

盤山紀遊用薊嬰老人韻。

四月十九日九兄招同妹婿天爵遊盤山道中作。注·天爵先九伯父胞妹文。

驅車東郭門。遙望通州路。吟成紀行詩。俗言解老嫗。山程勿云遠。百里始跬步。行行遵河濱。歷指舊遊處。去轍將登盤。歸舟擬泛潞。

宿煙郊

行穿綠楊叢。是向煙郊道。日晡風大作。獵獵塵沙掃。在林無勁枝。於野多偃草。維時方苦旱。所遇出意表。祈雨反得風。誰與問蒼昊。我行畏天威。旅店停驂蚤。

夏墊早飯

柳外三竿日。車傍一笛風。漸於城市遠。已似畫圖中。野飯黎祈白。村醪蜀黍紅。正須諳此味。前路莫匆匆。

段家嶺

入村逢戲場。集衆金聲吼。遠近爭趨赴。人至如川阜。層臺面招提。百尺出高柳。共愛歌舞歡。寧辭佇立久。

驅車偶經過。日色近申酉。去去不復顧。要飲山中酒。

邦均古槐歌

君不見秦山古槐。唐時木。奇古相傳海內獨。爾來歲久生意微。巨圍中裂喬柯禿。凡材終非不朽姿。那得千春色常綠。邦均老槐何代餘。山經郡志不之書。我來覽碑立庭除。疑非唐物心躊躇。薊嬰老人好古者。經過賦詩於其下。為驚百尺走龍鸞。不惜孤村駐輿馬。我有鄙言君勿阿。平生持論無私阿。此槐料是唐後物。豈反享壽千年多。世間虛譽亦如此。不符名實將如何。按唐初至今僅千歲。原詩有是唐非唐漫矣。唐前物矣。

入山

石徑延緣一字行。閒遊不計短長程。詩成只合輿丁賞。借用袁簿展健寧勞太守驚。借用謝翊峭壁仰瞻宸藻麗。高峯俯視暮雲平。此中花鳥如相識。到處歡聲笑口迎。

遊天城寺

幽絕天城寺。詩翁昔此居。謂茶亂泉飛帛下。列嶂翠屏舒。逐日添新詠。經旬返舊廬。斯人今已矣。過客盛纓裾。

遊東甘澗

我來盤山遊。相逢多俗士。所至遭訶叱。賦命真窮圯。憶昨西澗過。爆竹響腳底。異哉此何聲。驚人山谷裏。寺僧延我坐。殷勤問爵里。說言不實答。意在避遊子。今朝東澗行。幽事差可喜。茅簷揖枯僧。入室但書几。相對有餘閒。烹茶汲澗水。門前斗笠松。龍吟遶塔陀。一聽滌煩襟。豈惟清我耳。此間信幽僻。欲別身慵起。笑彼西澗僧。逢迎盡朱紫。

牡丹

肯教邱壑遠京華。到處山房卽我家。來較茶翁遲兩日。薰風落盡牡丹花。

絕句

四圍山色筍輿前。歷盡崎嶇亦偶然。不到風亭窮遠目。祇疑無處覓平川。

遊萬松寺

天城寺東石橋畔。走馬來看玉龍澗。仰穿仄徑窮幽奇。暗入深林忘近遠。林分遙露山巒嶮。嶺轉俄看地平衍。杜甫新從伊闕遊。子瞻初識匡廬面。石蹲虎豹紛無數。松走虬龍動盈萬。流水聲中隱寺門。青山闕處開層殿。迴視如臨千丈淵。到來不假雙飛翰。高閣爭看聖藻留。枯禪共把佛名轉。戶外雲奔滄欲歸。牕裏風生冷然善。懷賢自應生企慕。考古亦足擴聞見。會將濟勝傲諸子。登臨有具終無倦。明日同尋舞劍臺。汗流氣喘休揮扇。

亂石莊

登盤有三路。東路是茲莊。茅屋高林側。柴門亂石傍。雲中散雞犬。日晚下牛羊。偶至因沽酒。山風入坐涼。

盤泉

山行聞水聲。時作隔林響。問人知泉名。穿雲事幽訪。溪中晾甲石。數丈平且敞。涓涓新溜瀉。勢若長川溢。清聽滌煩襟。臨觀聊倚杖。卽事欲賦詩。佳句墮渺莽。清泉石上流。初月波中上。此景不易得。吾將夜中往。

少林寺

改觀思元代。緇黃爭此場。廢興無定在。僊佛總荒唐。柏古龍形出。雲生塔影藏。淹留貪茗話。歸路已斜陽。

盤山二首

朝行盤山左。暮行盤山右。盤山千萬盤。拱峙來爭秀。風生萬壑松。月印三潭水。招提憑巒巔。隱見白雲裏。

山居夜月二首

人間夜初靜。雲斂月正吐。矚戶微寒生。松露滴如雨。主客各已眠。獨酌無儔侶。月色遍高林。林下幽泉語。

贈岱瞻上人

盤山諸衲子。幾輩號詩人。羨爾才無敵。兼之懶是真。孤高寧絕物。名實不關身。柴背三間屋。年年草木春。

青溝盤谷寺三首

攜客青溝去。言尋拙老蹤。著書資友力。吟句動天容。直以溪山主。而兼風雅宗。斯人去我遠。當世未應逢。我皇謁陵罷。返駕幸山阿。聖祖留題處。文孫興感多。爾來風破屋。昔日虎移窩。有詔重修葺。變輿擬數過。前輩風流遠。當年遺札存。吾儕宜敬玩。俗手莫輕翻。日曝蟲難入。煙燠字易昏。老僧勤護惜。留取鎮山門。

卽事

爲訪池蓮乘興來。臨流擬泛野人杯。無端門外逢官長。草笠遮頭策蹇回。

松鼠

來往紛如織。肩輿爲少留。輕眞同過鳥。捷不數奔猴。飲水清溪上。餐松古樹頭。千人果何事。巖穴苦相求。

赴寺僧早飯

山行不裹糧。所需僧爲辦。到門卽延坐。茗果供杯案。須臾設盤餐。羹肴雜餅麵。僮僕各饜飮。輿輕行步健。此意未足酬。古人感一飯。

百草窪

不憚攀躋屐齒窪。澗邊來訪野人家。誰言四月芳菲盡。百草山中正作花。

古中盤寺有五松堂天語軒方丈圖額。係聖祖仁皇帝御筆。

中盤稱絕勝。登眺一迴晴。峰蓋青當戶。松堂綠染局。沙明金一色。石怪獸殊形。緬想宗風振。親承天語精。璇題留丈室。宸翰建山亭。不覩高僧面。空瞻故相銘。遨遊攜野客。興廢問山靈。有酒須歡飲。人生無百齡。

望山放歌

我聞田疇隱此山。是時梵刹猶未建。有唐創始遼金修。名菴八九傳來遠。更歷元明逮本朝。中間興廢誰經眼。大博已沒拙菴亡。孰其繼者蓋亦鮮。惟有青山似往時。遊人一望塵襟浣。

山中雜詠六首

豆苗時作羹。甘美壓羣菜。不知拙公遺。何以順老曬。拙公曾以此菜遺宋漫堂。韓駒順老寄菜花乾詩。道人禪餘自鋤菜。小摘黃花日中曬。○右豆苗菜。

相將采紫芝。似餉商山味。不見古仙人。坐愛煙雲氣。右木芝。

野人饋黃精。會待家釀熟。卻老非所期。把盞慰幽獨。右黃精。

曾哲曾嗜此。合號賢人棗。山中不知貴。卻道馬牙好。山中人呼軟蹄為羊矢棗。○嘗曰此羊矢耳。不如京師馬牙之佳也。○有軟棗。

芒刺聊衛身。模稜非吾友。濟勝而扶危。願君勿去手。右嫩杖。

花開客不看。子落僧慵掃。汝生既不材。焉用多名號。梓櫟榲桲。○右櫟榲子。皆櫟之通名。

與九兄露坐閒話

一榻形骸適。三杯禮數寬。山雲晴變夏。松月夜忘寒。倦枕生眠興。歸程入話端。來朝須早起。佳處遍遊觀。
妹婿天爵。欲於二十三日出山。九兄固留之。得緩期一日。

別期漸近恨茫茫。底事難將塵慮忘。一種來遊吾較欠。山中不得過端陽。

飛帛澗

遶澗山花錦作堆。鳴泉花底聽忘回。欲知飛帛名非妄。好向新秋雨後來。

讀盤山志及查蓮坡盤山紀遊集二首

日日山遊暮始回。探奇訪古恣徘徊。今朝攜得盤山志。絕勝山僧引路來。

一卷新詩細諷餘。對鷗才力更無如。邦軍鯨甲多疑義。正坐文人盡信書。
安客話。以為宜从軍。邦均。鯨甲石字从均。鯨。相傳。蓮坡按松溪紀聞。長。从鯨。好奇之過也。

黃龍寺

世俗傳訛久。遍知兩洞竇。不疑乃盜嫂。曾奉亦殺人。

過拙菴和尚墓

輿人遙指拙公墳。臺上孤亭竦處尊。行客經過下車馬。多於此處弔吟魂。

遊上方寺

側徑入上方，筇竹扶危墜。縱輸踏雲遊，還勝冒雨至。
上方之遊，茶霧遇雨，蓮坡諸君子值雪。石雞背人啼，松鼠驚
 客避。讀詩知明碑，考志識唐寺。天際一峰高，青削忽到地。
寺後有巖。

懸空石

懸石無依倚，勢若將傾廈。欲知不墜功，寸挺支其下。

松樹峪今改為東竺菴

我來松樹峪，疑是杏花村。沃壤春耕雨，孤峰晝閉門。當堦紅藥放，躍沼紫鱗翻。更想幽尋去，攜筇上古原。

雲淨寺

尋山忘遠近，訪塔認西東。
無暗律師塔，在寺左。東坡詩，只尋古塔認西東。寺接雲峰迴，林開顛宇空。勝遊程易迫，幽境歷難窮。絕頂明當去，高吟萬里風。

東竺菴如如亭先是因翠華臨幸亭額及壁間題詠，並為寺僧徹去。惟面亭石上小綉雲三字，尚存。

如如亭上逢僧話，小綉雲邊借客眠。堪笑題詩小遊戲，卻輸鑿石大因緣。
十字即蓮坡所題柱聯也。

絕頂四首

我從山下來，危磴穿林木。徑轉露花宮，金碧紛盈矚。不知棟裏雲，何時吹滿屋。
右雲潭寺。

孤峰雖峯崿，其上平如頂。諸峰儼兒孫，羅列聽管領。宵來挂明月，中有山河影。右挂月
崢嶸舍利塔，乃極盤山巔。不知起何時，或疑統和年。至今風雨夜，佛燈時復然。右舍利
峯與挂月齊，衆山非汝對。不見黃龍祠，弔古感興壞。引領望薊門，心知煙樹外。右自來

束裝

昨日看山酒，將離進一觴。松雲回首戀，櫻麥到家嘗。客子初嚴駕，奴人已負裝。車中惟辦睡，此去是康莊。

出山

何時茅屋結幽巖，話別山靈曉雨霽。咫尺碧峯雲霧合，黛眉已隔水晶簾。

是日辰刻微雨，午後復晴，晚宿夏塾。

朝別青山碧澗東，車輪輾破夢匆匆。懷人□□□初闕。九兄在段家嶺，親劇後至。飲馬洵河日欲中，沙路風恬平□
掌。麥畦雨過綠成叢。晚來買飯經行處，又試翻匙稻粒紅。

過通州

渡河重過水邊城，天際晴陰倏變更。買得釣船楊柳外，坐聞細雨打篷聲。

舟行二首

輕舟一葉是歸程，卅里清波水面平。行到水南勞望眼，通州不見見都城。

殘陽□□□清漣。雨柳風蒲兩岸前。不恨捲簾惟白水。昨朝歸自碧峯巔。

旅店三首

準擬今宵返舊閭。依然旅店稅吾車。高樓酒罷扶歸處。自笑粗豪氣未除。
夜來無夢到林樾。秉燭非關遊夜闌。壁虱牀牀人影亂。未應照蠹是奇觀。
盤山面目見來真。澗壑繁紆峯隱嶙。遍和茶翁紀遊句。祇應佳處愧前人。

墓誌銘

乾隆十二年五月十三日。有蒼頭奴白衣冠。奉書冊踵門叩余曰。小人宗室某僕也。主於是月十一日亡矣。遺令以詩集呈公。刪定。且乞志墓。語畢泣。余聞之驚。亦泣良久。乃啓其書。既歎生年之不永。而其人其文。不可無述以傳也。生名恆仁。字育萬。又字月山。系出高皇帝。父普照。素工詩。封八分公。官宗人府宗人。西安將軍。以積有勳勞。生齠齡襲公爵。後以不應封坐廢。益躄志於學。而朝廷方設學教宗人子弟。生慕之。具狀宗人府。以戊午三月來學。時孫府丞灝與余同官翰林。董學中事。見生恂恂儒者。皆愛之。及讀其所爲詩。余尤器焉。生亦獨親余。間與談。隲今古。學博而思精。淵淵乎有所得。而其志遠。其心虛。殆深窺造物者之無盡藏。將戾飫而自得之者。無何以嘗受封。故例不得留學。垂涕而出。蓋在學僅二十五日云。然家居學益勤。時時就余論詩。及余罷官閒居。生請業益數。余令以詩呈家侍郎德潛。侍郎亦亟賞之。且歎嗜學之勤。時髦無與匹。今年四月中。生來請刪定其詩。余諾之。臨去依依其容。若有不釋然者。別二十餘日。竟死。年僅三十五。悲哉。去秋天子幸瀛臺。生擬侍宴詩。聖世雅音。遠近傳寫焉。國朝宗潢。人文邁往。代自紅蘭貝子岳端。首倡風雅。問亭將軍博爾都。紫幢居士文昭。曉亭侍郎塞爾赫。後先迭起。遠追漢河間。東平之盛。而生獨慕紫幢之爲人。紫幢從王尙書士禎遊。辭爵讀書。爲士林所重。查編修慎行。以宗室高

人序其集。雍正中卒。余哭於臺溪第中。及得生。如見紫幢焉。而今已矣。雖然。生之詩。清徹朴老。克具古人風格。其足傳於後無疑也。生子宜孫。宜興。將以月之二十一日。附於先塋之次。余往視葬。先期爲文以畀之。俾勒諸石。銘曰。

高原蕭蕭白楊樹。有清宗室詩人墓。千載闕藏安且固。

賜博學宏詞出身。巡視山東漕運。江南道監察御史。前入直武英殿。同修起居注。稽察宗人府官學。翰林院編修。仁和友生沈廷芳拜撰。

跋

宜興生四十有二日而孤。稍長。生母陳太夫人。謂宜興曰。若彌月時。曾抱見父一面。又稍長。述先大夫平生甚悉。復授詩數帙。曰。此汝父所作也。一生心血具在。無使失。宜興謹受而度之。嗚呼。人子卽不肖。猶或逮一日之養。侍左右。奉色笑。而宜興呱呱。縹裸中。蒙先大夫目光一注。曾不得一髣髴音容。可哀也已。自後就傅讀書。益解文義。輒篝燈丙夜讀之。見先大夫誠孝之德。沖和恬澹之氣。嗜古之勤。如依吾父之膝下。而聆告語也。則抃躍以喜。已又念留貽者陳迹。而吾父之嘯笑俯仰。已杳不可親也。則彌顧影徬徨。或涕泗交頤而不能已。蓋幾三十年於此矣。每欲手輯成編。鹿鹿未暇。癸卯秋。承乏盛京禮部。始得次第釵之。詩話一卷。附於後。俱先大夫未定草。歿後。仁和沈椒園先生爲訂定。節什之三。今錄如訂本。而以其次答先大夫詩。題於集端者。附載卷首焉。癸亥甲子詩漸多。乙丑丙寅僅存。試後四首。瀛臺賜宴恭記四首。當更有底本。不知何自缺也。又沈歸愚先生選國朝詩別裁。有先大夫詩二首。而舊帙中亦不載。今並收入卷三末。可知逸失者多矣。宜興不能詩。不敢妄有增損。惟事蹟人氏未著者。就所知注一二於下。謹加注字別之。釐爲四卷。共詩二百九十九首。詩話一卷。共四十三則。而後先太夫人斤斤付與之意。稍可以自安。嗚呼。可哀也已。先大夫之殯也。椒園先生作墓誌銘。載家世行狀。謹附卷首。不贅述。抑宜興聞之。先

太夫人與諸尊長云。先大夫性至孝。嫡母郭洛羅太夫人。撫如己出。先大夫先意承志。能盡其歡。既廢爵。遵太夫人戒。杜門絕賓客。終身不妄交一人。文藝外更無他嗜。襲爵十有一月。入宗學。二十有五。日益自刻厲。曰。吾屬係天潢。受恩極渥。當守身勤學。勿負國恩。勿貽母憂。足矣。居太夫人喪。苦由不起者數。哀痛輟吟。事生母陳太夫人如嫡太夫人。病革時。尤依依孺慕。先胞叔祖經公。舊襲奉恩輔國公。壬子奪爵。先叔祖故英俊。廢後以期招族中天子姪於家園。飲酒賦詩。先大夫未嘗不侍從。或春秋佳日。聯轡遊近郊。得句欣然相賞。人目爲兩書生。不知後故公也。嘗言學業得力先叔祖爲多。終身敬禮無閒。與人以誠。以恕。無疾言遽色。僮僕小過弗譴訶。宜興所聞先大夫之盛德。類如此。先大夫舉子三。長卓立。嫡母伊喇里納喇太夫人出。年十一殤。太夫人亦早卒。次宜孫。字貽謀。生而寬厚。族黨咸以寬呼之。曾任右翼宗學副管。丁酉卽世。遺姪二。明繩。今宗人府主政。明紈。宗學生。次卽宜興女。一適富察氏員外郎穆靖安。俱陳太夫人出。宜興兄弟等旣幼孤。撫字婚嫁。皆先祖母先母拮据。而宜興少嬉遊惰學。尤塵慈懷。今蒙皇上教養生成。由筆帖式游擢卿貳。而先祖母暨先母已於己丑庚寅相繼棄世。風木之感。彌覃恩。以宜興官。先祖母誥贈太夫人。先大夫誥贈光祿大夫。嫡母生母皆誥贈太夫人。蔭荷聖上之渥恩。而蚤夜冰兢。求不辱先人者。又不徒文字表彰之末矣。乾隆五十一年。

興百拜謹識



三十年五月五日
該書店

編主五雲王

編初成集書叢

集詩山月

中華民國二十八年十二月初版

纂者 恆 仁

發行人 王 雲 五
長沙南正路

印刷所 商務印書館

發行所 商務印書館
各埠

(本書校對者曹鈞石)

台

E五四二七上

錢



83
14
:2300